



Jumat, 7 Juli 2023
Ogen: Titus 3:14



Geluh Erguna



Erguna, em rusur pengajaren si ibelasken man anak jabu ras anak sekolah. Tutus ate sekolah nakku, gelah geluhndu pagi erguna man jabu, gereja ras masyarakat. Terakap dengen ernanam pagi akap kalak si rembak ras kam. Meriah akapna erteman ras kam. Bage me pengajaren dengen totonta nandangi anak-anakta. Engaki maka geluhta arus erguna?

Arah pengajaren Paulus enda si dat pesan maka geluhta arus kita erguna erkiteken kita enggo ndatken penebusen ras ngaloken keselamatan i bas Tuhan Jesus nari. Labo erkiteken metungging kita ngalokensa tapi perbahan kekelengenNa si la erleka man banta. E maka Kesah Si Badia tiap wari mpelimbarnya geluh ras perukurenta ku si mehuli seh maka tambah warina tambah si mehuli i bas dirinta. Biak si mehuli si lit i bas dirinta e arus teridah ras ternanami kalak sideban. Kita erbahan mehuli labo gelah kalak mehuli man banta, tapi gelah tandai kalak si enterem Kristus si perkeleng e arah perbahanenta.

Perbahananen si erguna e benaken i bas si kitikna nari, nggit megiken teman i bas ia nuriken perbebenna, mereken semangat gelah lit denga sura-surana nerusken kegeluhen, nampati ia mereken serpang pulah, ngelayasi pusuh teman si sangana erceda ate. Mereken si lit i bas kita lako nampati teman subuk pemete, waktu, duit, ras jabunta. I bas nampati situhuna kita pe isampati. Umpamana, lit motorta banci ipake temanta di kune ia perlu naruhkan keluarga si sakit, si isi lebe minak motor e emaka si bereken ipinjamna. Bagenda musim mpeberkat anak sekolah, si bereken dukungan semangat man anak-anak si berkat ku ingan si mbaru, di kune lenga pernah ia ku ingan e, banci kita ras-ras ndarami alamat si ituju subuk arah online entah manual alu nungkuni keluarga ras teman meriah.

Jesus umurna 33 tahun ngenca i bas doni enda, tapi tuhu-tuhu erguna geluhna man banta ras kerina tinepa. Situhuna, labo muat gedangna umur geluhta. Bahanlah si erguna gelah lit nanamna kita nggeluh.

📖 Untung kap adi geluhta erguna